

# Da las avugadias uffizialas a las curatellas professiunalas

La regenza tira bilantscha davart la realisaziun dal nov dretg da la protecziun d'uffants e creschids

DA MARTIN CABALZAR

■ **Cun il cumenzament da l'onn 2013 è entrà en vigur il nov dretg davart la protecziun d'uffants e creschids. En quest connex han tschintg autoritads regiunalas per la protecziun d'uffants e creschids surpiglià las incumbensas da las anteriuras autoritads tutelaras e las anteriuras avugadias uffizialas èn vegnidas remplazzadas da las curatellas professiunalas.** La deputada *Anna-Margreth Holzinger-Loretz* (pld Aschera), sutegnida da 63 consignants, han vuli da la regenza in'emprima bilantscha davart l'introducziun dal nov dretg. L'interpellanta dumonda schebain las organisaziuns e las structuradas novas sajan sa cumprovadas ed en tge secturs ch'igl existia anc in basegn d'agir. Era duai la regenza dar scleriment davart las pretensiuns envers ils mandataris privats e davart la collavuraziun tranter las autoritads per la protecziun d'uffants e creschids e las curatellas professiunalas. Pli-navant vulan ils interpellants savair sch'i dettia ina pratica giuridica unitara resp. in'armonisaziun da las proceduras e schebain ils meds finansials e las resuras persunalas per ademplir questa incumbensa sajan sufficientas.

## Il Grischun è sin buna via

Tenor la regenza èn las autoritads per la protecziun d'uffants e creschids (Apuc) actualmain intensivamain vidlonder da transferir las mesiras dal dretg vegl da la protecziun d'uffants e creschids en il dretg nov. Sin fundament da las numerusas sfidas durant la fasa d'installaziun ed en consideraziun da las midadas sin il sector da la tgira genituriala che va en vigur questa stad dettia in tschert retardament tar quests transferiments, conceda



**Deputada Margreth Holzinger-Loretz (pld Aschera) ha pretendi da la regenza in'emprima bilantscha concernent la realisaziun dal nov dretg da la protecziun d'uffants e creschids.**

FOTO M. HARTMANN

la regenza. Fin ch'il dretg nov saja realisà e fin ch'ina pratica applitgbla saja s'establida e fin che las proceduras sajan optimadas e fin che ils puncts cuminaivels cun ils numerus partenaris funcziunian a moda irrepreschabla stoppian las auto-

ritads per la protecziun d'uffants e creschids pudair disponer vinavant da dapli temp, punctuescha la regenza.

## In project da dimensiun istorica

L'introducziun dal nov dretg saja ina re-

furma da dimensiun istorica che saja vegnida taxada da differentas varts sco «project dal tschientaner». Ina valitaziun da la midada possia dentant vegnir fatga pir suenter ina fasa da trais fin tschintg onns. Las experiencias fatgas suenter in onn e mez mussian dentant ch'il Grischun saja sin buna via.

Il basegn da persunal saja vegnì sutvalità, cunzunt er areguard la lavur supplementara. Per quest intent hajan las tschintg Apuc survegnì al cumenzament da quest onn in augment da tut en tut tschintg plazzas supplementaras che sajan dentant limitadas fin mez 2016. Cunzunt saja vegnì constatà che la procedura da rendaquint da la gestiun dals mandats absorbeschia bler temp, uschia ch'ins saja londervi d'examinar ina simplificaziun.

## Pretensiuns creschentas

La regenza constatescha era che las pretensiuns envers ils mandataris professiunals e privats sajan s'augmentadas en general, quai che haja dentant mo per part in connex cun il dretg nov. Sin il champ da las assicuranzas socialas, dal traffic bancar, dals uffizis e da las autoritads s'augmentian las pretensiuns formalas adina dapli. En cas da donns da la facultad haja il chantun da nov ina responsablada directa. Las Apuc scoleschan e cusseglian ils mandataris privats uschenavant sco pussivel ed han era edì in mussavia detaglià per la gestiun d'in mandat (cf. [www.kesb.fr.ch](http://www.kesb.fr.ch)) che serva sco ovra da consultaziun. Ord vista da singulas autoritads possian las pretensiuns bain esser s'augmentadas fermamain, quai stettia dentant en connex cun las praticas fitg differentas tranter las anteriuras autoritads tutelaras.

## Collavuraziun tranter las Apuc e las curatellas professiunalas

La collavuraziun cun las curatellas professiunalas sco partenaris ils pli impurtants saja ina da las incumbensas centralas da la Apuc che saja era lur organ da surveglianza. Actualmain saja centrala l'instrucziun da las curatellas professiunalas davart ils novs andaments da procedura e davart las implicaziuns dal dretg nov. Tenor la valitaziun dals manaders da las autoritads da protecziun funcziuna la collavuraziun – abstrahà da las sfidas specificas d'ina regiun – fitg bain. Las curatellas professiunalas hajan fundà il settember 2012 la Federaziun grischuna da las procuraturas professiunalas che sajan dentant anc en la fasa da constituiziun.

## Ina pratica giuridica unitara

«La furmaziun d'ina pratica unitara è en emprema lingia l'incumbensa da la direcziun generala da la Apuc che sa cumpona dals tschintg directurs da las Apuc regiunalas», punctuescha la regenza. La direcziun generala sa radunia mintga mais ed haja gia relaschà differentas directives davart l'incassament dals custs, las revisiuns, ils contracts da mantegnim e d'assistenza e la represchentanza legala gratuita. En l'applicaziun dal dretg sajan las singulas Apuc dentant independents, punctuescha la regenza. In'armonisaziun cumplexsiva da la pratica giuridica pretendia dentant ina pratica da las dretgiras cumprovada, uschia che quai vegnia anc a durar intgin temps. Percunter servian ils models da decisiun che vegnian adattads permanentamain a la pratica sco elements impurtants per fixar la pratica e per armonisar las proceduras. La finala vegnia elavurà fin la fin da 2016 in «manual per las Apuc» che duai servir sco ovra da consultaziun.